

brüderlich/ wie David vnd Jonathan geliebet/ er auch solcher Liebe in der letzten Todesangst nicht vergessen könnte.

Nach diesen/ als jhm abermahl eine Ohnmacht zugangen/ hat jhme Herr Colerus etliche Trostsprüche/ vnd endlich den Christlichen Glauben fürgesprochen-[Nij v]chen/ vnd darauff gefragt: Ob er jhn verstanden? Darauff er mit Ja geantwortet. Als er weiter gefragt: Ob dann Jhr Gestreng. das/ was derselben vorgebetet/ von Herten glaube? Vnd ob Sie in solchem Glauben beständig biß an Jhr seliges Ende gedächten zu verharren/ vnd darauff nach Gottes willen zu leben vnd zu sterben? hat er zweymahl darauff geantwortet/ Ja/ Ja. Auff welches er jhme Gottes Gnad/ Trost vnd Beystandt gewünschet/ vnd jhn wider etwas ruhen lassen. In dessen hat der Herr Daniel Ludwig Medicus von Zerbst jhn bißweilen angestrichen/ vnd zu zeiten ein Löffel köstlichen Wassers eingeflösset.

Umb den Mittag vnd bald gegen zwölf Vhr haben jhm in die letzten Züge zugestossen/ do jhm dann etliche kräftige Trostsprüche zugeruffen worden/ als Johan. 3. Also hat GOtt die Welt geliebet/ etc. Jtem/ Christus ist mein Leben/ Sterben ist mein Gewin/ Phil. 1. v. 21. Leben wir/ so leben wir dem HERrn/ Sterben wir &c. Rom 14. In deine Hände befehle ich meinen Geist/ Psal 31. v. 6. Vnd endlich aus dem Gebet Christi/ den Verß:

Von allem Vbel vns erlöß/  
 Es sind die Zeit vnd Tage böß/  
 Erlöß vns von dem ewigen Todt/  
 Vnd tröst vns in der letzten Noth/  
 Bescher vns auch ein seliges End/  
 Nimb vnser Seel in deine Händ. Matt. 6.

[N ij r] Mit diesen hertzlichen Seufftzen vnd andächtigem Gebet hat er sein Leben vmb zwölf Vhr zu Mittage/ auff welche er den vorigen Tag gezielt/ da er gesagt/ seynd nicht des Tages zwölf Stunden/ wer weis aber zu welcher Zeit Gott mit seinem Hülffstündlein wird kommen/ beschlossen/ vnd im Kindlichen Vertrawen vnd beständiger Zuversicht auff Gottes Gnad vnd Barmhertzigkeit/ vnd das thewre Verdienst JEsu Christi vnser Erlösers/ seinen Geist auffgegeben/ vnd in Frieden/ wie Simeon/ diese Welt gesegnet/ vnd der Seelen nach in das Himlische Paradiß auffgenommen/ da er nun alles außgestandenen Creutzes vnd Elends reichlich ergetzet vnd kräftig getröstet wird.

[...] Vnd ob er schon sein Haupt hat legen müssen/ so hat er doch eben dazumahl [N ij v] die Krone der Gerechtigkeit/ die Krone der Ehren vnd des ewigen Lebens erlanget/ da er in dieser Welt gelebt 58. Jahr/ vier Wochen einen halben Tag/ Jm Ehestandt aber 19. Jahr weniger 6. Wochen/ vnd dem hochlöblichen Fürstl. Hause Anhalt 29. Jahr treulich vnd redlich gedient/ wie dann solches nicht allein die hochlöbliche gesambte Fürsten von Anhalt/ durch jhre ansehnliche Gesandten/ bevorab vnser gnädige Herrschafft mit jhrer persönlichen gegenwart/ sambt dem gantzen Fürstl. Hofflager/ anjetzo bey seiner jetzigen angestellten Leichbegängnis vnd Beerdung/ sondern auch zuvor mit vielen heissen Thränen/ welche hochgedachte vnser gnädige Herrschafft vber seinen tödtlichen Abgang vergossen/ in Gnaden jhme zum vnsterblichen Ruhm/